

lis Gnovis

■ NEARÛT DI COSEAN. Il dirit dai Dominis coletifs

Te lezion di vinars ai 17 di Fevrâr, la «Cattedra delle Proprietà collettive», screade an passât dal Centri studis e documentazions sui Demanis civics e lis proprietâts coletivis de Universitât di Trent, e tornarà a ocupâsi di jurisprudence. Aministradôrs dai Bens comugnâi e studiâts si confrontaran sui câs frontâts e disbratâts di doi avocats valents come Mauro Iob dal Forum di Trent e Elisa Tomasella dal Forum di Belum, ative ancje in Cjargne e in Friûl par difindi i dirits di Comunitâts menaçadis di usurpadôrs publics e privâts. La lezion, «on line» su la Plateforme «Zoom» dal Ateneu trentin (<https://sites.google.com/unitn.it/proprieta-collettive/cattedra/incontri>), e sarà presentade dal professôr Geremia Gios, a 17.

■ SAN QUARIN. Un patrimoni di protezi

E tire adilunc la «tournée» dal documentari «Incanto d'erba... e urgenza» che Roberto Pizzutti i à dedicât a la presentazion dai prâts permanents de Patrie. Il cine e lis presentazions a intindin di svilupâ la cognossince, ma ancje di stiçâ l'impegn di duj par protezi un patrimoni ambientâl straordinari, in zornade di vuê, ridusût a blecs e ch'al pericule di lâ al mancul. Lis proiezioni bielzà stabilidis, seont la note dal lûc internet https://www.google.com/maps/d/u/0/viewer?hl=it&ll=45.95804604947691%2C13.083138249999985&z=11&mid=1ojzj3fjhKAN4vbXqoWkRcjV6hY_MgCc, a son chê di San Quarin (ai 17 di Fevrâr), di Triest (ai 23), di Clauian (ai 24), di Flumisel e di Pasion di Prât (ai 25).

■ PALUCE. La musine di Lino Straulino

Sabide ai 18 di Fevrâr, il cjantautôr cjargnel Lino Straulino al presente il so libri «La musine dai cjants». La convigne, inmaneade de Pro loco di Paluce, e tacarà a 20.30, li de glesie di San Nicolau. L'opare, stampade des edizions «Nota» di Valter Colle, e je stade definide un «cjançonir in forme di manuâl». Cul autôr, a àn colaborât Marisa Scuntaro, Donato Toffoli, Celestino Vezzi e Alessandra Santi.

■ PORDENON. Cors par diventâ romanzîr

Magari no diventaran duj scritôrs di gale, ma almancul a podaran gjavâsi la sbisie di provâ a viodi cemût che si à di fâ par imbastî un romanç di sest. In dal rest, duj a àn gole di fâ cognossi la pome scuindude dal lavôr che a nascuindin intun casselin e che no olsin di tirâ fûr magari parcè che no son sigûrs di ce che a àn vût scrit. Ve duncje la ocasion che «Lordenone legge» al à inmaneade par i aspirants scritôrs di chenti: une scuele di scritture creative cun cinc mestris di gale come professôrs cun 180 oris di lezion. Si trate di une iniziative ben dispatussade, che e à su lis spalîs cutuadis edizions; un projet dedicât propit a chês che a son lis cuistions di fonde par imbastî, cemût che al conven, un romanç. I corsiscj, oltri aes lezions suntune plateforme digjitâl, a varan la pussibilitât di lei e di confrontâ i elaborâts tra di lôr e cui docents. Dut cûs, il cors nol podarà sigurâ il sucès, se al arlêf i dovès mançjà il sâl che al covente...

Miercus 15 S. Faustin vescul

Joibe 16 S.te Juliane vergjine

Vinars 17 S.ts Martars di Concuardie

Sabide 18 S. Simeon vescul

Domenie 19 VII Domenie vie pal an

Lunis 20 S. Zenobi martar

Martars 21 S.te Eleonore regjine

Il timp Zornadis serenîs.



Il soreli

Ai 15 al jeve aes 7.11 e al va a mont aes 17.33.



La lune

Ai 20 Lune gnove.

Il proverbi

Fevrâr, il soreli par ogni agâr

Lis voris dal mès

Intai ricès dai orts si semenin ancjemò selino, civole, ravanai, pomodoros, pevarons e melanzanis.



La fuartece di Palme la Gnove

Par siet seculi, dal 711 d.C., cuant che arabics e berbars, sot dal comand di M z Ibn Nusayr, a jentrarin te penisule iberiche, la Spagne si cjatà sot dai gnûfs parons, fintremai che la prese de citât di Granada, la ultime restade in man dai arabics, tal 1492 e puartà a bon fin la «Reconquista» de Spagne de bande dai rêcs catolics. Chei rêcs, intun prin moment, secont i tiermins de «Capitolazion di Granada», a acetarin che i arabics a vignissin tratâts come oms libars e che a podessin liberamentri lâ daûr al lôr cult. Chest par pôc. Sot dal sburt dal prin arcivescul catolic di Granada, Hemando de Tajalera, e dal gardenâl Cisneros, e fo inviade une campagne di evangelizazion dai musulmans – daspò slargjate a dute la Spagne – che ju obleà a convertîsi o scjampâ in esili. Chei che a acetarin la conversion a forin clamâts Moriscos. Une vore di cristians spagnûi, dut cûs, a pensavin che tantis conversions a fossin di comut, e che tancj musulmans, tal segret dal lôr cûr, a continuassin a mantignî il lôr cult. Ancje te Patrie dal Friûl, tal '600, tai verbâi dal Tribunâl de Inquisizion di Udin a son conservâts diviers procès che a riviardin conversions, ma al contrari:

Te Ete di Mieç, lis vueris, no dome chês di religion, ma ancje interès di tantis fatîs, a puartarin a conversions veris, sfuarçadis, o di comut, ancje te Patrie

dal maometanesin al catolicesim. L'event plui impuartant al sucedè te fuartece di Palme la Gnove, dulà che oltri soldâts di chenti a vivevin mercenaris cravuat, dalmatins, bosniacs, albanês, morlacs e grêcs, che la Serenissime no i abadave di ce religion che a fossin. Il prin di chescj procès al è dal 1605, e al trate de conversion dal maometanesim al cristianesim di un ciert Raiach de Chisevaz, nassût in Cravuzie, ben che l'ultin, che al cjape dentri alc come 13 turcs, al ven celebrât tra il 1643 e il 1670. In dut, i procès celebrâts a son une ventine, e cualchidun cun plui di un protagonist. Cuntun cûs di «dople conversion». A si trate di Nicolau Paulovich obleât, secont la sô testimoniance, a une sorte di dople conversion. Cjapât, che al veve disevot agns, dai Turcs, al fo metût intune buse e pacât fintremai che a no si fos convertît al maometanesim. Al diventà musulman ma restant, tal cûr, simpri cristian. Rivât a scjampâ de prision, si presentà al Inquisitôr par... riconvertîsi al cristianesim. E, simpri tra chel archivi, si cjate forsit il cûs plui intrigôs di chesti conversions: chê dal ebraisim al cristianesim, che Abramo Nantoa, un dai prins ebreus stabilîs a San Denêl te metât dal '500,

al intindeve di fâ, forsit ancje par podè sposâ un pueme cristiane. L'intric de cuistion al nas par vie che il nodâr spilimberghês Paolo Vasio, che al lavorave a San Denêl, e che al veve abraçât il luteranesim, al veve cirût in mil manieris di sconselâ a fâsi cristian. Abramo no dome al si convertì e al sposâ une cristiane, ma ancje al denunziâ il Vasio che, ae fin, al fo condanât dal tribunâl de Inquisizion. Ancjemò, tra i procès che o vin dite, si cjate ancje un che al riviuarde un cûs propit particolar: chel dal tentatîf di un ebreu di San Vît dal Tiliment, Mosè Belgrado, di induci un cristian a passâ al ebraisim.

Roberto Iacovissi

Udin, Messe par furlan

A Udin, la Messe par furlan e ven cjantade sabide ai 18 di Fevrâr aes 5 e mieze soresere, li de capele «de Purità», daprûf dal domo (cun Radio Spazio che le trasmet sul moment). Al compagnarà la celebrazion il Côr «Sot le piargule» di Percût. Al disarà messe pre G. Gabassi.

Tradizions furlanis dal mès par cure di Mario Martinis

CARNEVÂL

Il mès di fevrâr al è soledut il mès dal Carnevâl, fieste dal unvier cunfinade de Glesie jenfri la vilie de Epifanie e il Miercus de Cinise, che e scree la Cuaresime. Cheste fieste «laiche» e vignì a cjapâ dentri i caratars des antighis festivitâts «di passaç» ae primevere, lis tradizions de ete inaugurâl, i simbolisims cosmics e altris alegoriis antigonis. Plui di ogni altre fieste, il Carnevâl al è peât al cicli agrari e ae sô fase plui critiche metode tal pont di incuintri-scuintri jenfri une anade finide e chê altre che sta par scomençâ. Ancje tal Friûl rurâl di une volte il Carnevâl al vignive celebrât une vore, par vie che dentri si rinovavin lis inversions e i savoltaments alegorics tipics dai rituâi «di passaç» e cussì ancje la classe subordenade e podeve provâ a divertîsi cun parodiis, mascaraments e costums che scambïavin lis parts sociâls. In tâl maniere ancje i puars, in maniere metaforiche, si permetevin di cjoli vie e someti par un moment il siôr e il potent, il latifondist, il podestà e il predi, o ben chei



che a jerin tignûts eternis ostacui de emancipazion sociâl. I pais a diventavin la arene de baldorie e de trasgression, il larc palc dal ecès e de matetât, cun fiestis, cjants, bai, cjar, vivandis grassis, dolçs e vin fin ae grande sieradure de gnot dal Carnevalon (martars gras). Il dì dopo, Miercus de Cinise, prin di de lamie e magre Cuaresime, al vignive stabilît di gnûf ogni ordin e jerarchie, si discjamavin lis propriis colpîs cul dizun, lis preieris e lis variis astinencis, e e vignive impastanade di gnûf la tele dal timp di ogni dì, cu lis sôs normâls scansions. In di di vuê, però, ancje cheste fiestone agrarie di un timp e je scuasi dal dut discomparide e cualchi mascarade si ten dome in tai gruês centris e in qualchi citât ma plui che altri par dilet e cun finalitâts dome turisticis. Nol è il Carnevâl di une volte, cuant intai curtii, tes ariis e tes andronis di ogni pais si davin dongje zovins e vecjos, oms e feminis a fâ baldorie, a mangjâ e bevi e soledut a balâ in mascare cu la musiche dal liron e de armoniche.